

EDITORIAL

Maungod nga papintason an pag-ato han katawhan ha pasista ng rehimen US-Duterte

"PAKUSGON AN PARTIDO! Pamunuan an pag-ato han katawhan kontra ha pasista nga pag-atake han rehimen US-Duterte!" Ini an panawagan han Partido Komunista ng Pilipinas (PKP) para ha anibersaryo hini hadton Disyembre 26.

Tukma ngan napapanahon ini nga panawagan ha Eastern Visayas. Bug-os kusog nga gin-gamit han rehimen an terorismo han estado agud mag-lansar han pasista nga pangatake ha rehiyon ha porma han diri-deklarado nga balaud militar. Ginpapaungbaw han mga pasista nga tropa an klima han kahadlok ha kabaryuhan, samtang ginpapakaraot ngan ginhahas an mga makamasa nga organisasyon ha kasyudaran. Ha mga baryo, tuyo han pasista nga pag-atake nga ihimulag an masa ha Bagong Hukbong Bayan (BHB), ipiton ini ha hul-os nga panmilitar nga sitwasyon ngan puypuyon.

Kundi napakyas an kontrarebolusyunaryo nga gerra ni Duterte. Luyo han mas abante nga armas, sumuntok la ha hangin an mga pasista nga tropa hini ngan padayon an pagsuporta han masa ha rebolusyon. Napuruhan han BHB an kaaway nga nag-amkon han mas damo nga kaswalti.

Tungod kay naruyag nga igpabilin an presente nga sistema, dugang nga napipiritan an rehimen Duterte nga pakusgon an pasista nga pan-

muypoy kontra ha rebolusyunaryo nga kagiusan ngan ha katawhan nga naato. Kinahanglan magpakusog an Partido ngan epektibo hini nga pamunuan an ngatanan nga porma han pag-ato han katawhan Pilipino agud tapuson an paghahadi ni Duterte.

Kinahanglan desisibo nga pamunuan han Partido an BHB agud makalansar ini han mas hiluagan ngan ginpapintas nga ginerilya nga pakiggerra. Isahon an kapas han BHB ha para ha gerra, pakusgon an pulitiko-militar ng pagpahiaran ngan pagpakaupay ha pag-oorganisa ha masa nga parag-uma.

Kinahanglan pamunuan han Partido ngan BHB an masa nga parag-uma ha kabaryuhan agud maisog nga ipakigbisog an ira pan-ekonomiko nga interes ngan atubangon an mga pag-atake han kaaway. Pag-usahon an masa, pahitas-on an ira diwa nga mapan-ato ngan pagpartisiparon ha gerra han katawhan. Ha kasyudaran, bug-uson an mga sangay han Partido ngan hilarum nga sikreto nga kagiusan nga maserbe nga taludtod han paggios para ha suhol, trabaho, edukasyon ngan serbisyo sosyal.

Ha paggrabe han pagkukuri han katawhan Pilipino, natikaklaro an panginahanglan nga makigbisog ngan magrebolusyon para ha nasyunal nga demokrasya. ■

BUWA! nga balita tikang ha AFP

#1 "Mga sibilyan, dabi ha
ambus han BHB ha Borongan"


SIGON HA ARMED Forces of the Philippines Central Command, usa nga puya an namatay samtang nasamaran an iba pa nga sibilyan ha ambus han BHB ha mga elemento han Philippine National Police-Regional Public Safety Battalion ha Borongan Eastern Samar hadton Disyembre. Gin-aningal dayon han Malacañang, AFP ngan PNP ini nga pambabaluktot.

Diri ambus kundi banggaay han van ngan sakay nira nga pedicab an nakasamad ha mga sibilyan, sigon ha BHB-Eastern Samar ha pahayag hini hadton Disyembre 16. Sigon ha usa nga pasahero, hirayo an aksidente kun diin nahitabo an ambus ngan waray hira kumita han aktwal nga buktuhay. Tulo nga pulis an napatay ngan tulo an nasamaran ha nasering nga agway.

#2 "Pula nga mangaraway
tikang ha Samar, sumurender
ha Isabela"

HA USA NGA bidyo nga ginpagawas han 5th Infantry Division-Philippine Army ha *social media* hadton Disyembre 29, ginrekluta kuno han BHB hi Marvin Del Monte Asadon alyas "Anthony" hadton 13 anyos pa la ini ha Eastern Samar. Kahuman, ginburubalhin kuno hiya ha Bulacan ngan Quirino tubtub ha Isabela kun diin hiya sumurender ha 5th ID.

Antes an nasering nga bidyo, ginkundenar han publiko an 9th ID ha pagdoktor hini ha usa nga piktyur han mga kunohay "sumurender" nga kaapi han BHB ha Masbate hadton Disyembre 26. ■



Pakusgon an Partido, pamunuan an pag-ato ha pasista nga rehimen US-Duterte

ATUBANGAN HAN GINPAPINTAS nga kampanya han pasista nga panmuypoy han rehimen US-Duterte ha katawhan Pilipino, gintigamnan han Partido Komunista ng Pilipinas (PKP) an ika-51 nga anibersaryo hini ha usa nga pahayag hadton Disyembre 26.

Sigon ha PKP, ginpapakita hini nga pasismo an natikahilarum ngan kroniko nga krisis han naghahadi nga sistema. Gin-eespiho liwat hini an kadesperado han rehimen Duterte nga igpabilin an presente nga sistema. Butaray na an pasista nga paghahadi hini pinaagi han diri-deklarado nga balaud militar, nga nagtutumuyo nga puypuyon an pakigbisog han katawhan ha kabaryuhan ngan kasyudaran.

Paborable ngan kinahanglan ha ngatanganan nga porma han pakigbisog an naungbaw nga sosyo-ekonomiko nga krisis ngan paniniyupi ha katawhan. Sanglit, nanawagan an PKP nga labaw nga pukawon, organisahan ngan pagiuson an milyun-milyon nga Pilipino. Kinahanglan kumprehensibo

nga magpakusog han kalugaringon an Partido, magpahiluag ngan gumamot ha ranggo han katawhan agud mapamunuan hira ha pag-ato ngan ha gerra han katawhan.

Kinahanglan gihapon ini pakusgon han Partido, konsolidahan agud himuon an hiluagan nga ginpapintas nga ginerilya nga pakiggerra. Kinahanglan liwat mapagios an an masa nga paraguma agud mas makapahiluag an BHB.

Kinahanglan ig-urusa han Partido an katawhan Pilipino ha usa nga hiluag nga nagkakaurusa nga prente agud sukton ngan pabagsakon an tiraniko nga rehimen ni Duterte. Optimistiko an Partido nga magpapadayon ini nga pakigbisog ha masunod nga tuig, pagtatapos han PKP. ■



Ukoy-bubto, madinaugon –NDFP

GINDEKLARA HAN NATIONAL Democratic Front of the Philippines nga madinaugon an ukoy-bubto giutan han Gubyerno han Pilipinas (GRP) ngan PKP-BHB hini nga kapaskuhan, duha kaadlaw antes ini mahuman hadton Enero 7.

Ha pahayag ni Propesor Jose Maria Sison, tagapangulo nga pampulitika nga konsultant han NDFP, waray magtalapas an magkaluyo nga gapil tikang han magtahag an GRP ha NDFP han kopya han pagsuspendir han mga operasyon han AFP ngan PNP hadton Disyembre 26.

Ha luyo ini han mga agway giutan han BHB ngan mga pwersa han GRP ha Camarines Norte ngan Iloilo hadton Disyembre 23, an talaan nga pagtikang han ukoy-bubto. Gin-eksplikar han NDFP nga waray pa igpalusad ni Duterte ha AFP ngan PNP an mando nga isuspendir an ira mga operasyon

hin mahitabo ini nga mga agway. Sigon kan Sison, poyde magsalawad han kaso kabahin ha mga gin-aalegar nga pagtalapas ha Joint Monitoring Committee han NDFP at GRP.

Nagdeklara han *unilateral* nga ukoy-bubto an NDFP ngan GRP agud hawanan an dalan para ha ertestorya pankamurayawan hini nga Enero. Sigon kan Sison, kinahanglan padig-unon anay an una nga mga kasarabutan han NDFP ngan GRP tikang hadton 1992. Maungbaw ini ha mga deklarasyon ni Duterte nga nagbasura ha ertestorya pankamurayawan, ngan magpaplastar ha adyenda han usa nga

Trump, parupanmatay ha pagpapapatay ha heneral han Iran
–Prof. Joma

GINTAWAG NI PROPESOR Jose Maria Sison nga parupanmatay an presidente han US nga hi Donald Trump tungod ha pagmando hini nga patayon an higtaas nga upisyal militar han Iran, kalakip an usa nga heneral, hadton Enero 3.

Sigon ha tagapangulo han International League of People's Struggle, an *airstrike* han US kanda Hen. Qassem Soleimani, nga arogante nga ginamin ni Trump, usa nga butaray nga pag-atake ha soberaniya han Iran, ha internasyunal nga balaud ngan ha batakan balaud han US.

Sigon kan Sison, nasubay ha agresibo ngan terorista nga kinaiya han imperyalismo nga US an pagpatay kanda Soleimani. Gintawag niya an imperyalismo nga US komo "numero uno nga terorista ha kasaysayan" nga nanhibang ha kinabuhi ngan pananag-iyahan milyun-milyon katawo ha bug-os nga kalibutan. Katuyuanan ni Trump nga lahusan an iya *impeachment* ngan magdaug ha masunod nga eleksyon pinaagi han pagpukaw ha patriyotiko nga sentimyento, nga naayon liwat ha interes han imperyalismo nga US.

Kundi dugang la hini nga gin-aaghat an katawhan ha Middle East ngan ha Amerika nga atuhan an terorismo han imperyalista nga nasud. Ginlalau-man ni Sison nga papipintason han imperyalismo nga US an terorista nga agresyon hini ha rehiyon. Ini gihapon an magpapadagmit ha ultimo nga pagbagsak hini, pagtatapos niya. ■

interim peace agreement. Kalakip hini nga kasarabutan an pagbuhi ha ngatanaan nga priso pulitikal, pag-apruba han mga prubisyon kabahin ha reporma ha tuna ngan nasyunal nga industriyalisasyon, ngan *coordinated unilateral* nga ukoy-bubto. ■

17

batalyon pankombat ha Southern Mindanao samtang kumander hi Lt. Gen. Filemon Santos, Jr., bag-o nga AFP Chief

4.1
TRILYON

Nasyunal nga badyet para ha 2020

\$80
KADA BAREL

Posible nga magin presyo han krudo tungod ha krisis ha Iran